

«Success è er fidanza»

Partida populara svizra dal Grischun

DA GION NUTEGN STGIER / ANR

■ En rotscha èn ils «giuvnals» da la pps grischuna vegnids a Domat en la cantina da la Ems Chemia per festivar la victoria electorala tar las elecziuns naziunalas. En tuttas modas e manieras è l'occurrèza stada ina festa populara cun ina ospitanta da buna luna. Tar las elecziuns naziunalas dals 18 d'october èsi reüssi a la pps grischuna in vair cup cun far bunamain 30% da las vuschs electoralas e cun obtegnair dus sezs en il cussegl naziunal. Che *Heinz Brand* vegnia confermà en ses uffizi era segir, che *Magdalena Martullo-Blocher*, la scheffa da la Ems Chemia, fetschia tantas vuschs ha strusch la direcziun da la pps grischuna sminà. Confirm a quai han 450 «giuvnals» festivà venderdi saira a Domat il success electoral da la pps grischuna e quai cun blera folclora, ina tschaina tipica ed in pled final da lur «surbab» *Christoph Blocher*.

Tuts fan insatge e tuttina nagut

Adina puspè ha el gi d'interromper ses pled pervia dal grond applaus e pervia dals givels da ses «apostels». Tema central da ses pled èn ina giada dapli stadada la libertad, la neutralitad, l'indipendenza e la suveranità da la Svizra. L'anterius cusseglier federal ha ditg che en ils cudeschs da l'istorgia svizra vegnia ina giada ad esser scrit che èn il 2015 haja dà en Svizra cun la pps ina partida che haja cumbattì per la libertad e cun la pbd ina partida che haja gi otg onns ina cussegliera federala, dentant co che quella saja vegnida elegida nagin che sappia. Christoph Blocher ha adina puspè ditg als preschents: «Tge fiss la Svizra senza la pps?». El ha lura er gist dà la resposta: «Gia da ditg en l'Uniu europeica, là nua che tuts fan insatge e tuttina nagut.» Durant l'entir program lateral è adina cussegliera *Eveli-*



Cusseglie naziunal Heinz Brand (a san.) ed Andrea Davaz, il vicepresidente da la pps grischuna.

FOTOS G. N. STGIER

ne Widmer-Schlumpf stada la «schiba» e per part sin in nivel fitg bass.

Success obligà

Heinz Brand, il president da la pps grischuna, ha cunzunt engrazià a l'entira «famiglia» da la pps per il grond sustegn tar las elecziuns naziunalas. Vegl e giuven, en lieus pli gronds, en tut las regiuns dal Grischun sajan commembers e commembras stads activs cun ir a votar e cun sustegnair ils candidats e las candidatas da la pps. «Vus avais prestà lavur exemplarica», ha ditg Heinz Brand als 450 preschents. Menziunà ha el cunzunt la gronda lavur da *Valérie Favre Accola*, la

secretaria da la pps da noss chantun. Success oblighescha da cuntinuar, da vegnir anc pli activ e quai sin champ chantunal, regional e communal, ha ditg il president da la pps grischuna. En l'avegnir saja da dar anc dapli pais a las valurs da la pps, far attent votantas e votants sin quellas e quai gist dapertut, ha menziunà Heinz Brand. Success saja dentant er fidanza ed er en quella chausa saja da cuntinuar la dretga via.

L'unica partida seriusa

A pled è er vegnida l'ospitanta da la saira, la cussegliera naziunala *Magdalena Martullo-Blocher* e la scheffa da la Ems

Chemia. Politica seriusa fetschian be ils represchentants da la pps ed insumma saja la pps l'unica partida seriusa. En l'avegnir vegnia la pps a cuntinuar cun iniziativas e referendums, ella vegnia a s'engaschar per il bain dal pievel, per la libertad e cunzunt er a guardar pli ferm sin il cussegl federal. Da preschent ins auda pauc da bun da quel, gist quai che pertutga dumondas d'asil, ha ditg *Magdalena Martullo-Blocher*. Sin anc dapli ordinaziuns e regulaziuns saja en l'avegnir er da renunziar ed insumma saja da far atenziun sin ils funcziunaris a Berna che hajan memia bleras cumpetenzas, ha punctuà la dunna dal chantun Turtig.



Magdalena Martullo-Blocher ha beneventà (da san.) Reto Löttscher e Christian Durisch.



Bler applaus per Christoph e Silvia Blocher.



Cumenzà ha la festa cun chantar l'imni svizzer.



Lura èn ils tamburs da Domat sa preschentads a la raspada.